



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Bitvntino Episcopo & Marsicano Subdiacono & Capellano nostro.

urn:nbn:de:hbz:466:1-20006

non habuerit vel nepotes, filia vel nepti suæ obrentum beneficium dat in dotem, & de ipso tamquam de propria hereditate disponit. Si quando verò quisquam eorum prius viam fuerit uniuersæ carnis ingressus quàm filium vel nepotem suum iuxta formam præmissam secum de beneficio suo fecerit investiri, nihilominus filius vel nepos ipsius ei succedere nititur & patris beneficium obtinere. Si quis autem eorum semen non reliquerit super terram, nec clericus aliquis ex ejus consanguinitate compareat, laicus qui propinquior ei sanguine fuerat, per manum alicujus clerici vacantem Ecclesiam recipit, & percipit fructus. Ceterum si super his interdum non annuitis votis petentium, vel eis beneficium investituræ negatis, rapiunt bona vestra, & ecclesiastica spoliunt quæ requirunt, & aliter etiam vos non dubitant molestare, guerras & dissensiones contra vos sæpius suscitantes. Quia verò abusus hujusmodi canonicis obuiat institutis, volentes monasterio vestro paterna sollicitudine providere, auctoritate presentium districtius inhibemus ne quod ex ecclesiasticis beneficiis, quorum donatio ad vos spectat, vel duobus conferatur in integrum, vel post patrem nullo median- te filio tribuatur, aut cuiquam assignetur in dotem, vel ad consanguineos tamquam jure hereditario devolvatur. Nulli ergo &c. Datum Laterani III. Idus Iunij.

Scriptum est super hoc Treuerensi Archiepiscopo & Episcopo Tullensi præcipiendo ut si quis Abbatissam & moniales ipsas contra inhibitionem prædictam molestare præsumpserit, ipsi præsumptionem ipsius monitione præmissa per censuram ecclesiasticam appellatione remota compefcatis. Quòd si non ambo &c. alter vestrum, Datum ut supra.

IOHANNI ILLVSTRI REGI Anglorum.

*Epist. 66.
Redarguitur
de his quæ ege-
rat adversus
Episcopum Lemovicensem.*

VTinam gemitus & dolores prudenter attenderes quos nobis in Ecclesiarum oppressionibus & afflictionibus Clericorum frequenter infligis! Vtinam celsitudo regalis anxietates animi nostri respiceret quibus affligimur vehementer cum per eam coepiscopos nostros audimus irreverenter offendi & in opprobrium nostrum ac divinam injuriam ignominiosè tractari. Accepimus enim quòd tu villas, possessiones, & alia bona venerabilis fratris nostri Lemovicensis Episcopi per mi-

nistros tuos fecisti irrationabiliter occupari, quasdam à villis & hominibus ejus exactiones indebitas exigendo, ad oblationes etiam altaris sancti Leonardi, quæ ad ipsum Episcopum pertinere noscuntur, fecisti manus extendi, & per tuos facis recipi servientes. (In quo quantum regali magnificentia derogatur cognoscere poteris, si velis diligentius intueri) sicque uniuersa bona ipsius Episcopi per Seneschalcos & ministros tuos occupari fecisti quòd extra civitatem & villas suas cogitur exulare. Nolentes igitur, quantumcunque personam tuam in Domino diligamus, ut apud Deum nostra conscientia nos accuset si hæc dimiserimus ulterius incorrecta, celsitudinem regiam monemus attentius & hortamur in Domino per apostolica scripta mandantes quatenus eidem Episcopo ablata restituas uniuersa, & de damnis etiã illatis sibi ac suis & injuriis satisfaciens competenter, ab ipsius indebita molestatione desistas, & permittas eum tam in civitate quàm Lemovicensi diocesi liberam mansionem & quietam habere. Alioquin noveris nos venerabili fratri nostro Bituricensi Archiepiscopo firmiter injunxisse ut post frequentes & diligentes admonitiones tibi factas ex parte tam nostra quàm sua, te ad hoc per interdictum terræ, ad quantumcunque deveneris, dum in ea præsens extiteris, nullius contradictionis vel appellationis obtentu nostra fretus auctoritate compellat.

*BITUNTINO EPISCOPO
& Marsicano Subdiacono & Capellano nostro.*

Licet Tranenses Canonici ab initio dissensissent, tandem tamen omnes unanimiter consenserunt, dilectum filium * G. fratrem Casinensis Abbatis in Archiepiscopum eligentes, cujus electionem venerabilis frater noster P. Portuensis Episcopus tunc apostolicæ sedis Legatus examinari præcipit, & examinationem redactam in scriptis fecit sigillis dilectorum filiorum Archidiaconi & magistri * Petrar- chæ muniri, cum suo quoque sigillo ad sedem apostolicam transmittendam. Literas quoque suas nobis pro dicto fratre Casinensis Abbatis deprecatorias destinavit, quas cum decreto electionis omnium Canonicorum subscriptionibus roborato, necnon & litteris suffraganeorum & populi, tres de Canonicis Tranensis Ecclesiæ ab universo Capitulo destinati nobis humiliter præsentarunt, petentes electionem ca-

*Epist. 67.
De electione
Archiepiscopi
Tranensis.
Cap. 5. de off.
Legati.
* Cod. Colbert.
E. Andegou. C.*

** Cod. Colbert.
Petri Chle,
Andeg. Pa-
triarchæ*

PRIORI ET CAPITULO
Sagiensi.

nonicam de persona idonea celebratam auctoritate apostolica confirmari. Nos autem ad majorem cautelam à prædictis Canonis juramentum recepimus, non à nobis exactum, sed ab ipsis oblatum, & factum electionis, sicut est & moris & juris, examinavimus diligenter. Interim verò nuntius prædicti Casinensis Abbatis suas nobis litteras præsentavit, gravem contra jam dictum Legatum querimoniam continentes quòd postquam electionem examinaverat, & eam ad nostræ transtulerat deliberationis examèn, nuntiis jam directis, iterum eandem electionem malitiosè nimis examinare præsumpsit. Unde petebat per viros idoneos suspicione carentes de ipso facto diligenter inquiri. Cùmque præfatus supervenisset Episcopus, & ea quæ gesta sunt intellexissemus ab ipso, de communi fratrum nostrorum consilio examinationem secundam, tamquam à non suo iudice factam, postquam negotium ad nostram fuerat translatum examèn, censuimus irritam & inanem. Quia tamen ex his quæ de quibusdam juramentis & promissionibus factis audivimus, non levis in animo nostro dubitatio est suborta, ut secundum Apostoli dictum manus citò nemini imponamus, super his per inquisitionem legitimam volumus plenius edoceri. Quocirca devotioni vestræ per apostolica scripta mandamus quatenus ad Tranensem accedentes Ecclesiam, juramenti vinculo Canonicos astringatis ut super electionis processu plenam & meram aperiant veritatem, diligenter & fideliter inquirentes de juramentis & promissionibus & aliis articulis ad negotium facientibus, utrum videlicet aliqua promissio vel datio facta fuerit, à quo, & cui, quando, & ubi, quibus mediantibus vel præsentibus, utrum recepta vel spreta, & quis eam recepit aut sprexit, & si quisquam promissionem vel donationem noverat præcessisse, quare postea eligebar, distinguentes inter scientiam & auditum, & inter eos qui ab initio contradixerant & alios qui consenserant à principio, de quo fuit, & à quibus, qualiter, & quare juratum, sicque fideliter omnia conscribentes, sub sigillis vestris ad nostram præsentiam destinatis. Quòd si non ambo his exequendis infra mensem potueritis interesse, alter vestrum &c. Datum Laterani vii. Kal. Julij.

Post obitum Sagiensis Episcopi, votis eligentium in diversa divisus, tu, fili Prior, cum quibusdam ex Canonis pro parte tua, pro parte verò altera Archidiaconus Oximensis & quidam similiter de Canonis, ad sedem apostolicam accessistis. Ut autem de processu negotij notitia plenior haberetur, utrinque de mera veritate dicenda præstari fecimus juramenta. Tu ergo, Prior, pro parte tua coram dilecto filio I. tituli S. Priscæ Presbytero & Hug. S. Eustachij Diacono Cardinalibus deposuisti juratus quòd defuncto Episcopo Sagiensi fratres in Capitulo convocasti, proponens coram ipsis qualiter per F. & L. prædecessores, qui de gremio Sagiensis Ecclesie non fuerunt, Canonicorum erant reditus diminuti, & multa gravamina passa fuerat Ecclesia Sagiensis, consulens eis ut aliquis de ipsa eligeretur Ecclesia, qui paupertatem vestram expertus, compassionis vobis viscera exhiberet. Cùmque hoc verbum omnibus placuisset, tu sub professionis debito & obedientie vinculo promisisti quòd ab hoc proposito non recederes, præsertim cùm juri canonico consonaret, per quod electio de gremio Ecclesie statuitur facienda, si persona ibi reperitur idonea. Id etiam promiserunt à te singuli requisiti. Tu ergo & benedixisti omnibus hoc statutum perscrutantibus, & in transgressores de universorum assensu excommunicationis sententiam protulisti. Exin tribus tibi Canonis sociatis ad venerabilem fratrem nostrum Rotomagensis Archiepiscopum & carissimum in Christo filium nostrum Iohannem illustrem Regem Angliæ accessisti, ut defuncti obitum nuntiares. Sed cùm nihil proficeres apud eos, ad tuam Ecclesiam es reversus. Post hæc verò Rex ipse Sagium veniens, duos nuntios Capitulo destinavit, ex parte ipsius proponentes quòd Decanum Lexoviensem in Episcopum recipere procurarent. Respondentibus autem Canonis quòd utiliores & meliores haberentur in Ecclesia Sagiensi, regij nuntij subjunxerunt ut tres de Ecclesia & tres de extraneis nominarent, unum quem Rex vellet in Episcopum recepturi. Exclusis autem nuntiis, cùm super hoc commune consilium haberetur, Canonis omnes in te vota sua voluntate libera transtulerunt, ut quot & quos velles de Capitulo nominares. Tu autem plenius sciens merita

Epist. 68.
De electione
Episcopi Sagiensis.